

# Palazzo von Salis en nova glischur

■ (anr) **Suenter trais onns da restauraziun sa preschenta il Palazzo von Salis, era numnà «Altes Gebäu», en la Via da la Posta a Cuir, en nova glischur. Quel edifiz è en possess da la Banca Chantunala Grischuna (BCG) che ha finanzia la renovaziun. Davent da l'avrigl vegn il Tribunal chantunal puspè ad avair là sia sedia.** Trais onns han las lavurs da renovaziun e restauraziun vid l'anterieur Palazzo da l'envoyé Peter von Salis, eregi l'onn 1727, durà. Quels dis po il public prender invista. La BCG – sco possessura – ha impundì persuerter 9 milliuns francs. 400 000 francs ha il chantun contribuì per mesiras supplementaras da segirezza ed installaziuns da IT.

Tenor il CEO da la BCG, *Alois Venzens*, han ins aplitgà bain quels daners.

Mantegnair quest impurtant edifiz – sco part da nosa ierta culturala – saja da giustifitgar. – Per *Eduard Gasser*, commember dal directori e responsabel per las construcziuns da la BCG, han ins pudì realisar in rar project cun renovar l'«Altes Gebäu». Per tuts, stads participads vidlonder, è quella prestaziun il resultat da buna collavuraziun durant tuttas fasas.

Mantegnair in edifiz da tala valita è collià cun gronds custs e tgira permanenta. Gia 1998–1999 è la sanaziun exteriura dal bajetg succedida. 2006 ha la BCG puspè incaricà la firma d'architects Fontana e partenaris cun il concept da conservar e restaurar. Il settember 2009 è vegnì entschavì cun las lavurs. Igl è stà da prender grond resguard sin la substanza istorica.



La stanza cinese

FOTOS MAD

**Prender invista:**  
Dals 20–25 da mars 2012 pon ins visitar l'«Altes Gebäu» avant che la Dretgira chantunala retur-

nia puspè en ses vegl lieu. Cun las guidadas ha la BCG incaricà Chur Tourismus. Il dumber da plazz è limità. Ina preannunzia è necessaria.



La sala da dretgira



Corridor